

REZOLUTË

PËR VLERËSIMIN E VEPRIMTARISË SË BANKËS SË SHQIPËRISË PËR VITIN 2017

Kuvendi i Shqipërisë,

- Duke vlerësuar rolin kushtetues të Bankës së Shqipërisë për zbatimin e pavarur të politikës monetare dhe misionin e saj për ruajtjen e stabilitetit të çmimeve;
- Duke konsideruar objektivat që udhëheqin veprimtarinë e Bankës së Shqipërisë dhe masat e marra në përmbushjen e tyre;
- Duke marrë në konsideratë ndikimin e zhvillimeve ekonomike kombëtare, rajonale e botërore, në politikat e ndjekura nga institucioni;
- Duke mbështetur e nxitur bashkëpunimin me këtë institucion, si dhe bashkëpunimin e tij me institucionet kombëtare e ndërkombëtare;

Vlerëson veprimtarinë e Bankës së Shqipërisë, për vitin 2017, në drejtim të:

- Përmbushjes së misionit të saj kushtetues për zbatimin e pavarur të politikës monetare, ruajtjen e stabilitetit të çmimeve dhe ndikimit të saj në mbajtjen nën kontroll të inflacionit, duke kontribuar në rritjen e qëndrueshme dhe afatgjatë ekonomike të vendit;
- Përmirësimit të mekanizmit të transmetimit të politikës monetare, duke adresuar pengesat e identifikuar në bashkëpunim me autoritetet përkatëse që mbikëqyrin tregjet financiare në vend;
- Marrjes së masave, në bashkëpunim me autoritetet e tjera që mbikëqyrin tregjet financiare në vend, në drejtim të reduktimit të nivelit të euroizimit, për të siguruar uljen e ekspozimit të ekonomisë ndaj këtij rreziku dhe rritjen e efektivitetit të politikës monetare;
- Nxitjes së zgjerimit të aktivitetit kreditues nëpërmjet uljes së normës së interesit dhe uljes së primit të rrezikut të kredisë;
- Zbatimit me rigorozitet të planit të masave për uljen e kredive me probleme, si dhe ndjekjen e procesit për zgjidhjen e kredive individuale me peshë të rëndësishme në bilancet e bankave;
- Forcimit të rolit mbikëqyrës të Bankës së Shqipërisë në drejtim të rritjes së qëndruesh-mërisë së sistemit bankar dhe adoptimit të standardeve ndërkombëtare më të mira;
- Konsolidimit të funksionit të Administrimit të Rrezikut Operacional në Bankën e Shqipërisë. Implementimit të aplikacionit për menaxhimin e automatizuar të auditimeve dhe të procesit të menaxhimit të rrezikut operacional në funksion të rritjes së cilësisë së planifikimit, bazuar në rreziqet e identifikuar gjatë auditimit;
- Kontributit të dhënë në nxitjen e zhvillimit të tregjeve të kapitalit në vend, në mbështetje të zhvillimit ekonomik të vendit dhe në mbështetje të bizneseve dhe sipërmarrjes;
- Nxitjes së funksionimit normal të sistemit të pagesave me synim parandalimin e rrezikut sistematik dhe ruajtjen e stabilitetit të institucioneve dhe tregjeve financiare.

Kuvendi rekomandon që Banka e Shqipërisë, për vitin 2018:

1. Të forcojë bashkëpunimin me institucionet partnere brenda dhe jashtë vendit, të rrisë fleksibilitetin e instrumenteve të politikës monetare, në zbatim të objektivit kryesor: ruajtjes së stabilitetit të çmimeve.
2. Të kontribuojë në ruajtjen dhe konsolidimin e mëtejshëm të ekuilibrave makroekonomikë dhe financiarë të vendit. Të vazhdojë politikën monetare stimuluese për të krijuar premiset e nevojshme për kthimin e inflacionit në objektiv dhe për të mbështetur gjallërimin e aktivitetit ekonomik.
3. Të zbatojë Strategjinë e Politikës Makroprudenciale, e cila synon ndërmarrjen e veprimeve për parandalimin dhe trajtimin e rrezikut sistematik, në funksion të garantimit të një sistemi financiar të qëndrueshëm dhe eficient.
4. Të ndjekë në vazhdimësi zhvillimet financiare dhe ekonomike në vend, për të vlerësuar efektet që do të ketë aplikimi i masave të marra për uljen e përdorimit të monedhës euro në ekonomi, në funksion të rritjes së efektivitetit të politikës monetare dhe forcimit të stabilitetit financiar, si dhe të konsiderojë

ndërhyrjet e duhura drejt stabilizimit të kursit të këmbimit, për të mos cenuar konkurrueshmërinë e eksporteve shqiptare.

5. Të përmirësojë më tej funksionin mbikëqyrës, në përafrim me direktivat dhe rregulloret e Bashkimit Europian, parimet e Komitetit të Bazelit dhe specifikat e tregut shqiptar, për të siguruar një veprimtari të shëndoshë të institucioneve financiare. Të vijojë konsolidimin e mbikëqyrjes së bazuar në rrezik dhe përmirësimin e cilësisë së raportimit financiar të subjekteve të mbikëqyrura.

6. Të përfundojë hartimin e planeve të ndërhyrjes së jashtëzakonshme për çdo bankë në funksion të realizimit të mandatit të Bankës, që i njeh ligji nr. 133/2016 “Mbi rimëkëmbjen dhe ndërhyrjen e jashtëzakonshme në banka, në Republikën e Shqipërisë”.

7. Të ndërmarrë hapa konkretë në bashkëpunim me autoritetet e tjera mbikëqyrëse të tregjeve financiare, për përmirësimin e ecurisë së tregut primar dhe zhvillimin e tregut dytësor të titujve të qeverisë, ekzistenca e të cilit do të shtonte mundësitë e investimit dhe do të ofronte një kanal të rëndësishëm për sigurimin e likuiditetit në ekonomi.

8. Të kryejë një punë më intensive, në bashkëpunim me institucionet e tjera rregullatore, për ndërgjegjësimin e publikut lidhur me rreziqet që paraqet përdorimi i kriptomonedhave (paraja virtuale) dhe çdo formë tjetër spekulative që mund të konstatohet në tregjet financiare.

9. Të bashkëpunojë, në rolin e këshilluesit ndaj institucioneve qeveritare, për përmirësimin e ndryshimit të strukturës së borxhit qeveritar në favor të borxhit që shkon për investime në ekonomi.

10. Të orientojë sistemin financiar drejt kredidhënies ndaj atyre sektorëve potenciale të ekonomisë, të cilët kanë më shumë kërkesë dhe më pak risk, në mënyrë që likuiditeti i tepërt të përkthehet në mënyrë të shëndetshme për ekonominë, duke ndjekur paralelisht edhe planin e masave për trajtimin e kredive me probleme.

11. Të nxisë dhe të monitorojë përpjekjet e bankave për adresimin e problematikave të hershme të kredimarrësve të përbashkët, në kuadër të zbatimit të planeve të rimëkëmbjes e të zgjidhjes së kredimarrësve të mëdhenj.

12. Të përpiqet për gjetjen e mundësive të reja të investimit, për të minimizuar normat negative të kthimit, gjatë procesit të administrimit të rezervës valutore, pa cenuar objektivat e likuiditetit dhe të sigurisë.

13. Të nxisë përdorimin e instrumenteve elektronike të pagesave nëpërmjet përmirësimit të kuadrit rregullativ, zhvillimeve infrastrukturore dhe investimit në edukimin financiar të publikut, për të garantuar qarkullimin e sigurt, të shpejtë dhe me kosto të ulët të parasë në ekonomi.

14. Të forcojë më tej mirëqeverisjen e institucionit nëpërmjet forcimit të pavarësisë dhe rritjes së llogaridhënies. Të rrisë transparencën mbi veprimtarinë e Bankës së Shqipërisë përmes zgjerimit të informacionit dhe përmirësimit të vazhdueshëm të kanaleve të komunikimit me publikun dhe grupet e ndryshme të interesit.

15. Të rrisë kuptueshmërinë e politikës monetare, për të forcuar besueshmërinë publike të institucionit dhe për t'u mundësuar familjeve dhe bizneseve të marrin vendime të mirinformuara. Të ndërmarrë fushata sensibilizuese në kuadër të edukimit të publikut në lidhje me termat “lek i ri” dhe “lek i vjetër”.

16. Të ndjekë me rigorozitet ritmin e punimeve në godinën e ish-hotel “Dajtit” për të bërë të mundur funksionimin e kësaj godine në një kohë sa më të shkurtër.

17. Të rrisë ndikimin dhe bashkëpunimin me qeverinë për të çuar më tej reformat strukturore të saj, si dhe në realizimin e objektivave të qeverisë, marrë në kuadër të formalizimit të ekonomisë, të konsolidimit fiskal dhe sidomos për reduktimin e borxhit publik.

18. Të garantohet qëndrueshmëria dhe funksionimi normal i institucionit të Bankës së Shqipërisë, sidomos duke siguruar rinovimin në kohë të anëtarëve të Këshillit Mbikëqyrës që kanë plotësuar afatin e mandatit të tyre.

Miratuar në datën 17.5.2018

KRYETARI
Gramoz Ruçi